



太平三書卷之四

濟南張萬選舉之甫編輯

蕪湖勝槩一集

蕪湖縣學記

黃裳

崇寧元年仲秋天子思欲推廣神宗皇帝三舍造士之法詔講議司條具以聞本司奏言先王之時比閭族黨之間莫不有學所以明人倫厚風俗及其成也無思犯禮莫不好德伏請縣邑皆得以置學越十月



承議郎知蕪湖縣林修奉詔從事前此所建適如詔旨第率閭里子弟來就教育推布教條考察如法將升于郡學而使郡太守有以貢焉乃其職也鄉校之設黨有庠庠者養也以主乎造士遂有序序者射也以主乎選士兼斯二者而有之學也此學之名所以施於國歟黨領五族之衆先王之政已能使有相保之智相受之信相葬之禮相救之義教而化之猶以爲未也中有庠焉則養其德而成就之也遂領五縣

之衆有州民之仁足以相賙有鄉民之恩又足以相往來五常之善於是乎備矣中有序焉則觀其德而選取之也自黨遂之教廢庠序不設約束之規旣已疎漏修學之士多在城闕不及前古遠甚然而今之州古之國也縣邑皆得以置學其猶黨遂之有庠序歟昔時大夫富其民有術屬其民有政養育有道考察有法升移有序故其造士道德同宗本末相應未始有戾焉方今朝廷推行三舍考察之制凡目甚悉



必得爲宰者運量于中而使士之有累於貧者有所  
資有累於事者有所代積漸涵養視成論升出於優  
游而不迫上副朝廷樂育人才崇建學校之意庶幾  
成人有德小子有造其源則存乎鄉里而已此正天  
子有望於郡邑者也令尹其勉哉宋崇寧元年秋八  
月禮部尚書黃裳撰知無爲軍米芾書

湖陰詞

入圖書

溫庭筠

祖龍黃鬚珊瑚鞭鐵驄金面青連錢虎髯拔劍欲成

夢日壓賊營如血鮮海旗風急驚眠起甲重光搖炤  
湖水蒼黃追騎塵外歸森索妖星戰前死五陵艸碧  
春萋萋灞川玉馬空中嘶羽書如電入青瑣雪腕如  
槌催畫鞞白虬天子金煌鉉高臨帝座廻龍章吳波  
不動楚山晚花壓闌干春晝長

于湖曲

張耒

武昌雲旗蔽天赤夜築于湖洗鋒鏑巴驥驟駿風作  
蹄去如滅沒來不嘶日圍萬里繞孤壁虜氣如霜已



潛釋蛇矛賤士識天顏  
玉帳髯奴落妖魄君不見  
銅駝陌上塵沙起胡騎東來飲  
灑水浮江天馬是龍兒  
蹙踏揚州開帝里王氣高縣  
五百秋弄兵老滯空白  
頭石城戰鼓卧秋艸更欲君  
王分上流

汎蕪湖 入圖書

梁元帝

桂潭連菊岸桃李映成蹊  
石文如濯錦雲飛似散珪  
橈度菱根反船來荇葉低  
颿隨迎雨燕鼓逐伺潮雞  
往年隨故府吳興公夜泊  
蕪湖口今赴官西去

再過蕪湖感舊十六韻

杜牧

南指陵陽路東流似管年  
重恩山未答雙鬢雪飄然  
數仞慚投跡羣公愧拍肩  
駑駘蒙錦繡塵土浴潺湲  
郭隗黃金峻虞卿白璧鮮  
貔貅環玉帳鸚鵡破蠻牋  
極浦沉碑會秋花落帽筵  
旌旗明迥野冠珮照神仙  
籌畫言何補雍容道實全  
謳謠人撲地雞犬樹連天  
紫鳳起如電青襟散似煙  
蒼生未經濟墳草已芊綿  
往事唯沙月孤燈但客船  
峴山雲影畔棠葉水聲前



故國還鄉去浮生亦可憐高歌一曲淚明日夕陽邊

蕪陰樓上

蔡襄

野馬沈寒氣神禽度暖風斷霞天共紫斜日樹齊紅  
山口橫虛鈎江隍跋遠蓬解窮千里目爭奈思無窮

過蕪湖

林逋

寺中長愛杜池州說著蕪湖是勝遊山掩縣城當北  
起渡衝官道向南流風梢檣碇鳥初下雨擺魚薪市  
未收更好兩三僧院舍松衣石髮鬪僧幽

過蕪湖

薩都刺

吳姬水調新腔改馬上郎君好風采王孫一去春草  
深謾有狂名滿江海歌詩呼酒江上亭墨花飛雨江  
不晴江風吹破蛾眉月我亦東西南北人

蕪湖阻風

梅堯臣

春風任惡花自笑白浪不愁頭已白戢戢大船江浦  
邊崑崙五兩誰非客

蕪湖口畱別弟信臣

前人



太平三書 卷之四 五  
少也遠辭親俱爲異鄉客昨日偶同歸今朝復南適  
南適與簡書叨茲六百石重念我當去送我江之側  
溪山遠更清溪水深轉碧因知惜別情愈賒應愈劇  
離蕪湖至觀頭橋 前人

江口泊來久菰蒲長舊苗爭雛洲鵲闖遺子浦魚跳  
宿岸欣逢戍歸船競趁潮時時望鄉樹已恨白雲遙  
分題蕪城烟雨送吳原哲教諭 張以寧  
蕪城路年去年來自烟雨冉冉春濃濕燕絲濛濛曉

晴迷鶯樹鮑照愁絕未歸來爲畫當年斷腸賦登高  
悵望正思君帆影微茫又東去

醉歌行吊古

章嘉楨

于湖先生踏雪行赭山賦雪雪初晴江平謂似新磨  
鏡地迥云如玉琢成我今來此雪消盡山容潤靚江  
含清含情懷古清興劇高叫于湖不可作江頭貰酒  
綠千鍾南曲和笙北絃索昇仙橋西張氏宅今日誰  
家烟漠漠月轉街樓雁陣寒酒闌客座燈花落醉讀



下湖蹈雪詩猶令雲霞生春壑

懷龍身之蕪陰舊遇

湯顯祖

龍伯空江引釣絲掣鰲無奈黑風隨幾回赤鑄山前  
立恰是秋風鳴劍時

姑孰秋江白紵催風波一落更難回五開銅鼓知何  
意漫入乖龍耳後來

蕪湖

曹學佺

樂府湖陰曲王敦夢日窺君玉乘駿急將士玩鞭遲

晉壘相持處吳波不動時空聞可兒歎說與塚傍知

登蕪湖縣山

前人

晝涉江中路宵登湖上丘市喧孤磬斷風色片帆收  
牛渚青山老蠓磯翠黛愁客程能不遠一望白門秋

蕪湖立春

鍾惺

七日途中序暗移故鄉風物已孜孜園梅太早難相  
待堤柳雖疎不肯垂除歲春生微雨夜客舟家共一  
燈時入閩歸楚明年事此際茫然不敢思



過蕪湖

梅守箕

侵晨發宛曲落日下湖陰舟楫逐人語烟波空我心  
望迷兩岸濶雲合一江深興盡江南樂愁聽淮北吟  
倡樓初調瑟估客尚徵歌饌美兼魚鱠杯深折芰荷  
錢刀五方襍煙井萬家多誰信窮愁者悲涼一棹過

寄禹金蕪湖

前人

獵獵北風鳴年華鬢欲侵懷人十月暮隔水片帆陰  
天渺雁鴻斷江寒雨雪深不堪長極目前路氣蕭森

抵蕪湖郭

梅鼎祚

參差千雉合空闊一虹浮地入魚鰕市天維估客舟  
五方人雜語十月我來遊感慨平生意寒江細細流

約友看蕪湖競渡

梅士勸

我昔曾在蕪湖住五月五日觀競渡畫船綵鷁高接  
天雷笑雲歌遏江霧自我來斯今幾年不見橫江萬  
斛船會須一舸同君去重聽誰家舊管絃眼無暢觀  
神亦俗病中又對菖蒲綠丈夫有身不能跳蕩以自



快安得守此彈丸而鬱鬱吁嗟乎固是我輩初無奇  
有奇則世亦必知君不見屈原雖其人已死至今猶  
造龍舟而弔之

蕪湖縣城碑記

汪道昆

高皇帝都金陵列都邑以百數乃若據上游張左輔  
宜莫如蕪湖卽古所稱百二之區其地利不啻也時  
方墮城罷戍與海內休息之故邑非附郡者不城蓋  
有待耳蕪湖扼舟車關市之吭化居者之所必趨司

空歲遣使主告緡獨以權賦最天下承平旣久露積  
日殷嘉靖中島夷大入列邑盡城守所部將有事蕪  
湖會不果城逋寇五十出蕪湖薄都會議者猶以用  
力鉅損地多告罷復不果城歲已未盜劫縣庫七千  
緡吏民持議如前又復不果甲戌盜復劫縣庫五千  
八百有奇事聞上詰在事者狀讓提督操江都御史  
整飭兵備副使罷之建言者請城蕪湖下所部議會  
中丞宋公以巡撫至何公以操江至直指鮑公以巡



按至孳孳務紓上南顧憂旣而馮使君奉簡命飭兵至自朝會遂行縣召三老豪傑畫便室宋公出就行部決筴之上其議大略以故守吏丈城趾千九百有奇費七萬毋論力訕如之何其奪商業廢民居近議環縣署爲城俾縣得嬰城守藏足矣蓋僅僅丈三百費七千夫城以衛民如之何其棄民居而自衛非筴也今臣寬臣儀望臣希顏謹帥兵備副使臣叔吉守臣錢立相地則南畱瀕瀦而廛居者三達栽小橫街

西畱居室完美者百家栽古小永安巷東北則栽公家閒地不涉民居得地七百三十九丈爲城市肆不易經費則城市商民任版築者七之四鄉遂七之三畫地分工公家不精獨樓城門者四關便門者三城上爲周廬者十有五取給府庫百金城舉矣大司馬當督撫議上可之乃檄郡守奉行屬郡倅陳所敏韓相逋爲植縣丞張與邦主簿趙峨典史陳時善分督之耆民程繼經歷金汝賢敦工事以乙亥二月朔首



事迄五月終告成負山爲郭面江爲塹樹屏翰擁金湯不勞而功多不費而惠廣勿亟而事速成殆亦百城之冠也往不佞待罪司馬幸得操末議贊尚書比得請歸則城成者三月矣馮使君紹介子舍屬不佞碑之不佞久行間習疆事項歲南北多警往往乘寇虐下堅城使城而瑕是以城予敵也况不城乎顧非常之原難與慮始卽一言而未及征發境內莫不賄賄有司幸無及於其身又何所利而任之也藉有不

測安所登陴輕則噬臍重則暴骨蓋上下胥失之矣豈直有司過哉抑或喜事暴施勞而功半卽其材下視避事者爲猶賢進之則任事程功較若畫一此其於事多濟非中材以上者不能乃若說使忘勞事半功倍則又其上也晉漢奉陵邑不憚三遷七遷蓋將疆幹以隆上都慮至遠矣蕪湖轄五方而府萬貨惡用選選以彼其饒何論鄠杜諸邑乃今完繕爲固由此而弭不逞銷未萌百世之利也是役也承之君命



協之民情稽之天時爲不愆度之地利爲無害出之  
公幣爲有度均之羣力爲不煩語曰哲夫成城當事  
者是已載攷春秋之城列邑國不絕書楚叔敖城沂  
君子以爲敏子囊城郢君子以爲忠顧叔敖三月而  
成子囊猶有待於後嗣功用殊矣乃若決疑謀興曠  
事不再計而定不旬月而成則忠且敏者之爲其功  
上上不佞職方氏之籍具在法得書至如郡倅龍宗  
武劉垓縣令倪湯劉汝桂皆先後與有勞併勒之石

赭山

入圖畫

黃庭堅

讀書在赤鑄風雪彌青蘿汲綆愁冰斷邨酤怯路蹉  
玉峰凝萬象珠葍啄輕螺古劍摩空宇寒光啓太阿

赭山浮圖

歐陽玄

山分一股到江臯寺占山腰壓翠鰲四壁白雲僧不  
掃三竿紅日墦爭高龕燈未滅林鴉起花雨初收野  
鹿嘯千古玩鞭亭下道相傳曾掛赭黃袍

登赭山



湧出滄溟外孤高色更佳氣通丹穴霧光映赤城霞  
碧嶂橫遙漢紅泉落斷厓沙墩盡嵯戶茅屋半漁家  
墜石藤還絡尖峰樹不遮林昏騰蜃氣浪捲露鯨牙  
烽起狼烟直帆翻海舶斜平沙層作籬鹹土潤生花  
晚渡喧商旅嚴城沸鼓笳獨行惟雁鷺四顧盡蒹葭  
蓬島知何處鄉園望轉賒離心正欲絕霜角起嘔啞

赭山

趙琥

原墊周遭竹樹攢叢臺千尺枕層巒綺雲初散日光

迴香霧未收花氣寒苔印赭黃袍跡在塵迷金碧寺  
基殘爲貪此景堪詩畫滴翠亭前駐馬看

李衛公神山行雨記

沈端節

唐衛國公李靖微時嘗射獵靈山中寓食山邨邨翁  
奇其爲人每豐饋焉歲久益厚忽遇羣鹿乃逐之會  
暮欲舍而不能俄陰晦迷路茫然不知所歸悵悵而  
行困悶益甚極目有燈火光因馳赴焉旣至乃朱門  
大第牆宇甚峻扣門久之一人出問靖告其迷途且



請寓宿人曰郎君已出獨太夫人在宿應不可靖曰  
試爲諮白乃入告復出曰夫人初欲不許且以陰黑  
客又言迷不可不作主人邀入廳中有頃一青衣出  
曰夫人來年可五十餘青羃素襦神氣清雅宛若士  
大夫家靖前拜之夫人答拜曰兒子皆不在不合奉  
畱今天色陰晦歸路又迷此若不容遣將何適然此  
乃山野之居兒子還往或夜到而喧勿以爲懼旣具  
食頗鮮美然多魚鮮食畢夫人入宅二青衣送床席

裊褥衾被皆極香潔鋪陳閉戶繫之而去靖獨念山  
野之外夜到而鬧者何物也懼不敢寢端坐聽之夜  
將半聞扣門聲甚急曰天符大郎子報當行雨周此  
山七百里五更須足無漫滯無暴急應門者受符入  
呈聞夫人曰兒子二人未歸行雨次到固不可辭違  
時見責縱使報之亦已晚矣僮僕無專任之理當如  
之何一小青衣曰適觀廳中客非常人也盍請乎夫  
人喜因自扣廳門曰郎覺否請相見夫人曰此非人



宅乃龍宮也妾長男赴東海昏禮小男送妹適奉天符次當行雨計兩處雲程合踰萬里報之不及求代又難輒欲奉煩頃刻間如何靖曰靖俗客非乘雲者何能行雨有方可教卽唯命爾夫人曰苟從吾言無有不可也遂敕黃頭鞵青驄馬來夫人命取雨器乃一小瓶子繫於鞍背誠曰郎乘馬無須銜勒信其行馬蹄地嘶鳴卽取瓶中水一滴滴馬鬣上慎勿多也於是上馬騰騰而行其足漸高但訝其穩疾不自知

其雲上也風急如箭雷霆起於步下于是隨所躍輒滴之旣而電掣雲開下見所憇邨思曰吾擾此邨多矣方德其人計無以報今久旱苗瘁而雨在我手寧復惜之顧一滴不足濡乃連下二十滴俄頃雨畢騎馬復歸夫人者泣於廳曰何相負之甚本約一滴何乃私滴二十邪此一滴乃地上一尺雨也此村夜半平地水深二丈豈復有人妾已受譴杖八十矣袒視其背血痕滿焉兒子正連坐如何靖慙怖不知所對



太平三書 卷之四  
夫人復曰郎君世間人不識雲雨之變誠不敢恨卽  
恐龍師來尋有所驚恐空速去此然而勞煩未有以  
報山居無物有二奴奉贈總取亦可取一亦可惟意  
所擇于是命二奴出一奴從東廊出儀貌和悅怡怡  
然一奴從西廊出憤氣勃勃拘怒而立靖私念我獵  
徒以鬪猛爲事若取悅者人以我爲怯乎因曰兩人  
皆取則不敢夫人旣賜欲取怒者夫人微笑曰郎之  
所欲乃爾遂揖與別奴亦隨去出門數步迴望失宅

顧問其奴亦不見矣獨尋路而歸及明望其村水已  
溺極目大樹或露稍而已不復有人其後爲大將功  
蓋天下而終不作相豈非悅奴之不得乎世言關東  
出相關西出將豈東西喻邪所以言奴者亦在下之  
象向使二奴皆取卽極將相矣

神山時雨

入圖書

歐陽玄

山上叢祠李衛公阿香喚起滿山風祇因行雨瓶無  
盡翻覺凌烟閣未空百戰陰靈來瀕洞一噓元氣濕



青紅當年誤入神龍穴贏得天瓢助雨工

神山

黃浩

蕪湖之陰美風土不厭田家老門戶乍聞靈境蹟常  
存復道居人俗猶古天造神山鬱更奇山間原有衛  
公祠神靈萬古恒自著時雨一方何用祈君家素茂  
湖陰族盡是良疇遶山麓錦鳩啼處自滂沱白犢耕  
時已沾足有時旱魃始爲灾黑雲堆墨遮山來有時  
長虹截不斷綠苗如雲田水滿年年大有歲無荒白

梁黃稻盡登場此山膏澤由來盛願廣餘滋被四方

神山雜詩

許有壬

山畱殘雨濕拖雲竹引鮮飈細灑人詩思清如寒水  
玉休教落紙恐沾塵  
窗扉九夏鎮長開一榻無塵地有苔怪底山禽栖不  
穩竹林風雨送涼來

范蘿山 入圖畫

蕭照

蘿翠松青護寶幢煙波萬里送飛艘真人舊有吹簫



事俱徬明霞照晚江

上下驛磯

陳造

湖陰數里間山麓屹兩磯磯麓突江出禹功不及施  
千古妨行舟死生繫毫釐我昔步磯上雨歇暑氣微  
驚湍下百尺怒勢轟千聲尚憂坤軸動無怪沙岸欹  
螭龍渠得安過鳥翅欲垂頭眩膽爲掉坐歎舟上兒  
壯哉天下險姦軌容抵巇如身護風寒要地此幾希  
今來歲華暮去舟良坦夷人言水進退寒暑分盛衰

古來設險守亦有可易時函谷與劍閣秦漢嘗用之  
人輕地亡重正煩折筮筮恃險無與國與國須藩籬  
帝王所取重文武各攸司險易倏變改卽磯餘可推

驛磯山

貢欽

萬里長江突此樓主人高眼送淨漚狂飈吹落烏紗  
帽自有青天閣白頭

清風樓

王守仁

遠看秋鶴下雲臬壓帽青天礙眼高石底蟠螭吹錦



霧海門孤月送銀濤酒經殘雪渾無力詩倚新春欲  
放豪勅賦登樓聊短述清風曾不媿吾曹

荆山

李咸用

良工指君疑真玉却非玉寄言懷寶人不須傷手足

荆山

胡曾

抱玉巖前桂葉稠碧溪寒水至今流空山落日猿聲  
叫疑是荆人哭未休

荆山

入圖書

歐陽玄

一山西出一山東八字分明在水中來往古今多少  
恨客愁無不在眉峰

又

前人

青翠松杉一帶長雪峰倒影沒湖光一簑晴絮收菰  
米滿逕天花採玉肪涇水東流水滓白淮山西借夕  
春黃三年楚客江東寓每見荆山憶故鄉

荆山

王舟

孤峰翠嶺雪初乾影倒中流碧玉寒白是天成好詩



景摩挲老眼奈人看

荆山

吳珍

芙蓉青翠插天高。歷盡冰霜老不凋。一色玻璃浸寒影。釣徒詩侶共遊遨。

荆山

鄭延

荆山屹立江之東。挿天九朵金芙蓉。山中歲宴正飛雪。積素凝華連太空。道人獨坐清虛室。高捲湘簾對書冊。一般清趣許誰知。只有江潭釣魚客。

荆山

錢時

苦雨頻將霽色占。東風忙逐上嶙峋。桃花千樹低籬檻。佛面諸天亂石巖。遠障煙雲吞邑幕。平江風日掛蒲帆。何知謝朓驚人句。雙燕梁間自語喃。寒壁新題一曲阿。崎嶇頂上問奇過。巉灣轉面盤虬窟。荒野窮眸萬馬窩。落照四山雲淡寞。堆紅一磧草婆娑。寄言地主能窮賞。涇水汪汪可鑿波。

昨日一扁舟。荆山問渡頭。兒童野芳髻。漁父青絲鉤。



秧苗株株秀梅子粒粒抽滄浪歌歎乃中有小粧樓  
起行何所似却步如有求唐突逢官長不知誰去畱  
老農婦子餉風光日色謳聞說紫驪馬千金五陵遊

荆山

鄭之文

少小慕名山山經亦屢檢此中有荆山頗怪義不典  
尋山躡山足已露石嶄嶄其中有絕壁數仞亦奇險  
或幽或踳踞或臥或仰偃礪礪差不乏而氣太漾演  
山神未經意匆匆匡石產倘能具洞壑寧詎與臚淺

噪磯詞

菩薩蠻

王去疾

吳波深處波聲急闌干下瞰魚龍宅江北與江南斜  
陽山外山十洲三島地夢裏身曾至今日醉危亭神  
仙邀我盟

噪磯

入圖書

歐陽玄

銀濤堆裏屋岩堯聞說江心舊隱噪擬傍龍宮抄玉  
蕊如聆鮫室織氷綃道人晨起煙中磬靈后宵征月  
下潮占斷江南形勝地海門何處覓金焦



蠟磯靈澤夫人廟記

倪從

祀典崇四瀆江居其一庶人不得與祭然江流綿亘  
萬里風濤不測吉凶易相感觸以故或麗江上廟得  
賜額而通祀者必其初有捍災禦患之功也時有因  
革迹有廢興往往稽神之始末姓字證焉惟蠟磯山  
廟神靈澤夫人孫氏世相傳大帝妹蜀先主之配還  
省其母居于欒江聞先主崩以哀慕殞絕今之廟蓋  
藏所也蕪湖縣治一望而近兀然卷石江之心而廟

據其境凡雨暘愆期必以是而禱焉其感未嘗不應  
舟之往來卒遇風險莫不叫呼委命於神其幸而濟  
者曰神之休也有宋賜今廟額封號而神益以貴顯  
信于視聽矣廟燬于兵未幾道士謝德仙捐力起廢  
始爲正殿設李老君諸天神像以尊其教置別室位  
夫人于中前爲門後爲樓而祀龍女於傍募和陽邑  
民翁氏衆施田四百二十餘畝資香燈供祀之費辛  
勤三十年始復其舊而有加焉乃紀實介其友廬山



周君靜謁記京師余稽諸漢史建安十四年大帝資  
先主荊州之地而妻以妹先主入蜀大帝以舟船迎  
妹南歸與世相傳略同又謂其材捷剛猛有諸兄風  
婢百餘人皆持刀侍立以先主之雄才大略猶凜凜  
敬畏之夫有所敬畏則宴安內寵之患何自而生鼎  
峙之業其或有助焉不然則其所存者詎能與江流  
相爲與無窮哉余嘗舟過其下舟人莫不瞻仰致敬  
悚然而有所修省見於聲色夫人平居無事則肆怠

不顧藉孰知天地神明近在咫尺而平陸之險有甚  
於疾風巨浪者若內視無狃雖駕溟海若偃吾榻焉  
又奚外求哉雖然聖人以神道設教則廟位之立其  
或一助與書以遺君靜歸記諸石

登嶧磯次韻

王守仁

中流片石倚孤雄下有馮夷百尺宮  
灑瀆西瞻渾失地長江東去正無窮  
徒聞吳女埋香玉唯見沙鷗亂雪風  
往事淩其何足問永安宮闕草萊中



嶼磯

潘輿

長川白雲飛不絕孤島天高見明月雲來雲去變陰  
晴月升月落常圓缺江東月照川西雲佳期兩地傷  
離羣雲深白帝龍驂遠月冷吳宮鳳侶分霸圖自古  
忘生死割據何嘗戀妻子離心空對鏡月縣王氣惟  
連陣雲紫自昔結禱從益都何人造計歸東吳自將  
歡愛同雲散却把孀顏伴月孤炎龍已化音塵隔一  
旦清流埋玉骨貞魂遙共蜀雲歸遺恨不隨江月沒  
古廟緣江秋復春雲作衣裳月作神但看往來江上  
路至今猶說孫夫人

嶼磯

胡經

鬢髯金山勝依稀坐玉臺亭虛雲作衛石定浪生雷  
漢月疑環珮吳宮見草萊臨風起浩歎落日不成盃  
嶼磯

湯賓尹

繫艇垂楊處江心表舊基百年經變化片石失孤危  
山水難爲主乾坤幾自持金焦與瞿灑突兀起男兒



久說螺磯勝乘閒一起之涉江成露宿薄暮受風欺  
夜臥半帆月起瞻隔岸祠毋言興廢命登眺亦維時  
疑是永安宮音儀彷彿中佩刀驚衽席抱石泣英雄  
壁蘚柔蒸澤魚腥噉呷風憑誰操鐵板高唱大江東  
去不知雲雨夢來無

螺磯

顧起元

登螺磯

梅鼎祚

江門一柱倚中天濺沫飛流百丈懸知有龍宮秋不  
闕時時雷雨起尊前

螺磯

潘之恒

何處登臨表壯圖隔江磯上見于湖魚鱗屋底窺  
氣燕子樓前識舊都平楚蒼茫連夢草夕陽睥睨帶  
煙蕪曾將上下三山竝鼎列金焦大小孤

謁靈澤夫人祠十絕之五

范允臨

烟莽沈沈碧玉湮千年冷月泣孤燐  
萋迷香魄歸何



太平三書 卷之四  
處惟見江花空映人

蜃閣蛟宮枕激湍湘簾暮捲浪花寒秋風一夜巴陵  
雨腸斷歌聲咽木蘭

永安宮外月如梭衰艸寒坵吊螭蛄雙翼不如華表  
鶴春風杜宇淚痕多

桂墜冰輪漢殿幽粼粼宮水咽還流一從片石棲神  
後繡帳香銷紅壁秋

蠹粉椒塗生網絲濕螢涼露冷空祠鴛紋翠簟流塵

暗猶記當年望履綦

蠖磯弔孫夫人

冒愈昌

雲連蜀道永相望廟枕蠖磯水一方湘竹斑成曾帝  
女碧桃春老自劉郎虛傳孺子能分鼎不及夫人有  
瓣香劍戟祇今何處問萬山松檜領秋霜

蠖磯弔孫夫人

徐媛

旅卧蕪陰蕭蕭長日酸風射眸一片波光與枕函  
相度牢落羈心終成懶癖病起得蠖磯志讀之見



載蜀先主孫夫人始末甚詳因爲綜其前後草成  
俚語弔之

蜀主夫人東吳客靈祠控天椒壁赤裁雲割雨劈鯨  
鯢剪浪截風送行役香纓生綰帝室耦殞後龍淵寄  
貞魄神襟雄擅諸兄風何期悞墮周郎策憑陵三國  
勢縱橫吳蜀交婚豈良適忍教雙臂紅絲牽比作竿  
頭鈎綆擲青銅立影照孤鸞離夢杳成雲泥隔花館  
空懷孫武謀侍兒徒擁刀環嚇古來尤物自戕身蘭

菱香摧象齒灸結恨頻含隴阪烟啼聲競與江聲渚  
總帳灰飄帶上花石窓鬼瓦封泥射千年老狐笑空  
巢百足蛇孫鏹斷壁餓鴟窺筵竊餘供山魅漆燈起  
土隙强臬啄食獍牙張羈魂泣影青珠滴吳宮不借  
鳳枝栖恰來卧聽沙雞啗一灘孤月伴幽宵滿棹悲  
歌弔愁膈灘月依人西北流關河無計連郊陌君王  
古塚雲根穿夫人渡口波痕白爲爾傷心重一陳吳  
陵秋雨蕭蕭碧



重弔孫夫人

前人

杜宇啼聲斷客腸永安回首路茫茫錦城絲管渾如  
夢惟見春風掃綠楊

錦帳三千護主家王孫鶴駕暮雲遮幾番夢落樓心  
月簾外香浮玉洞霞

三國衣冠紙蝶飛蛟宮花草自芳菲當年激管繁絃  
地惟見黃壚白骨圍

將軍無策定雄圖巾幗周郎豈丈夫降城不假天山

箭粉黛翻爲金僕姑

列樹森森映蜃樓珠簾暮捲海風秋瀾迴碧渚千山

合坐擁刀環紫殿幽

萬古傷心鎖碧湍空餘衰草泣孤灘相望蜀國深宮  
月白帝城高起暮寒

白馬山

歐陽玄

僊人邂逅此相逢路入烟霞第幾重紫燕飛來綠有  
約玉驄馳去竟無踪巖前雨露生芝草澗底水霜老



太平三書 卷之四  
翠松幾度攀蘿尋勝蹟短筇扶我上虬龍

白馬山

徐璋

愛爾洞山清且幽仙翁曾此恣遨遊青山翠嶺還堪  
挹白馬奔騰不可畱鶴背長簫吹碧落雲間孤犬吠  
清秋何時得造煙霞境定擬題詩刻石頭

題白馬洞天圖

入圖畫

王蒙

燕北望南山山形如白馬騰雲入碧空洞壑連青滄  
紫燕避寒霜萬雛啄石乳香泥含春澍奇确峙霄府

風響有神來千峰助靈雨祠幢隱古仙瑤琴夜中撫

登白馬山護明寺

孔德紹

名嶽標形勝危峰遠鬱紆成象建環極大壯闡規模  
層臺聳靈鷲高殿邇陽烏暫同遊閨苑還類入仙都  
三休開碧題萬戶洞金鋪攝心罄前禮訪道挹中虛  
遙瞻盡地軸長望極天隅白雲起梁棟丹霞映拱樞  
露花疑濯錦泉月似沉珠今日桃園客相顧失歸途

吉祥寺

周紫芝



春江渺渺一鷗飛欲解扁舟未得歸試問顛風何似  
惡浪花藜裡看蠓磯

吉祥寺

韓元象

黃塵久厭市朝夢青蕩已孤鷗鷺盟誰解攜琴來此  
宿夜深隨意寫江聲

吉祥寺

黃庭堅

吉祥禪院考之載籍不知其所本父老言曩猶有石  
刻云院基於晉永和二年亾其名又言江南李昇初

爲徐溫乞子時徐知訓不能容昇置酒伏劍士欲殺  
之行酒吏刁彥能知其故以手爪語昇昇寤起伏於  
此院北山間古松下以免及昇有國名院曰永壽云  
其後僧紹熙焚巢毀像埽地幾盡天聖初知縣事太  
常博士董黃中逐紹熙以授僧自元而院中興景祐  
大饗帝於明堂賜院名曰吉祥元之徒繼主事者曰  
可旻亦有道行俗緣以故其佛事崇成上北山斬竹  
開屋凡數十楹旻死其弟可云可暹敗墮寺居略如



九平三書 卷之四 三  
紹熙時鐘魚不鳴像設風雨云等不能有爲迺求十方人主事閱知縣事晉陵胡宗質開封李士高始以邑中士大夫耆老之願起宣州廣教禪院僧慶餘傳法住持蕪湖未嘗有十方院院又蕪廢不可措手人以爲興之難而慶餘以元豐八年五月二十八日來就法席是日竹筍彌山道俗以爲瑞有屠者故鹵忍於是方欲解牛三夕不能奏刀已而牛見夢送我吉祥院屠以語市中人市中人則共買牛于吉祥至今

以供麥磴方念作經藏而法鼓自鳴餘亦不知寒暑日乞于市上風饑雪虐道無行人而夫須襪襖出作佛事故邑人動心焉其耆老亦有修禪奉律信有是道者以是坐賈行商與田間著姓破慳捨有日月至焉然餘自貧士一錢乞之而人有施四十萬者故歲行八周典舊起廢於今可以安方來禮勤舊下逮冗從皆有舍區又爲大轉輪經藏其費鉅萬方歲之不易居民薦苗於水火若不可爲而餘之立志如此不



可回奪餘之言曰蕪湖古大縣故嘗爲丹陽郡治所直中江之會舳艫相屬千里連檣輔我者衆則吾事當有濟時百足之蟲至死不僵吾以是沒吾世爲之是故能成難成遂濟登茲黃庭堅曰此山蓋爲永壽院者幾百年爲吉祥院者又五十年矣今乃蔚爲禪居再閱廢興可爲纍歎物之成壞相尋憑虛而責實蓋難爲功今觀餘之功緒且終是必將齋心服形退藏於密延十方之有道者爲佛法之供養豈能法鼓

虛鳴又爲磴下牛所笑哉故爲之記其所從來使後有考焉餘蓋授法於太平州興國院修穆而其同學弟仲珪實左右之

行春圩

入圖畫

楊萬里

桑疇入眼鬱金黃麥隴千機綠錦坊詩卷且畱燈下看轎中只好看春光

赤鑄山

湯顯祖

千將管此鑄芙蓉風雨千秋石上松借問闔門騰虎



氣何如江上鎮蛟龍

鶴兒山 入圖畫

蘇軾

人老簪花不自羞。花因羞上老人頭。醉歸扶路人應笑。十里珠簾半上鈎。

夢日亭 入圖畫

蘇轍

老虎穴中臥。獵夫不敢窺。驕驪服箱駮。盜驪巡城三。匪漫不知帳。中晝夢白繞壁驚。起知是黃鬚兒。馬鞭七寶留道左。猛士徘徊不能追。遺矢如冰去已遙。明

日神兵下赤霄。荒城至今人不住。狐兔驚走風蕭蕭。

夢日亭

王濤

樓船犀甲下荊州。蜂目將軍擁碧流。虎帳覺來驚日墮。龍媒嘶去亟星流。奸萌問鼎從何用。計落遺鞭始可羞。幽草亂花荒故壘。無人能作晉春秋。

夢日亭

湯顯祖

曾借君王七寶鞭。湖陰絳氣屬晴天。如今畫地連江海。祗合長安夢日邊。



玩鞭亭

孫元晏

天命須知豈偶然  
亂臣徒欲用兵權  
聖謨廟略還應別  
渾不消它七寶鞭

玩鞭亭

黃庭堅

平蕪春盡水陰天  
基壓危城駕廣椽  
駿馬豈能追晚日  
將軍莫悔玩遺鞭  
高才共賦新亭句  
逸翰重將舊曲鐫  
千古英雄只如此  
黃花修竹付幽禪

玩鞭亭

前人

除地誅茅縣左偏  
三山一碧正當前  
舍人爲寫湖陰曲  
禪伯請題湖上篇  
帳下勁兵纏象魏  
櫪中飛騎控巴驥  
至今庭竹根延蔓  
尚想當時七寶鞭

玩鞭春色

歐陽玄

蕪湖北望褐山蒼  
七寶鞭畱此道旁  
典午舊愁春艸綠  
巴驥遺跡陌塵香  
追風竟莫逃神策  
夢日猶能惜燭光  
傍舍至今人賣食  
年年社燕說興亡

玩鞭亭

盧摯



缺壺歌斷江聲秋鯨吐漢水皆倒流新亭未絕楚纍  
泣琅琊何至桐宮囚金鳥一飛半天赤夢裏妖奴失  
堅壁愁雲不暇護儲胥掣電騰空去無跡神鞭墮玉  
驚人間王良解鞚龍媒閑煙蕪慘淡碧波遠跋曳羣  
偷未敢還平生作計信良苦纔辨枯骸臭資斧犢車  
塵尾笑絕纓亦有清風滿千古乘時剽寇何足云溫  
郎高義殊可人坐觀萬乘此輕舉結舌乃與黃鬚噴  
漢家鼓車千里足秦庭主父徒自辱垂堂致戒昧前  
聞司馬家兒那免俗并州越石定不羣向來莽卓烏  
有墳無人說與桓將軍青山白紵君應聞

玩鞭春色

李堂

風煖雲閑上此亭亭花爛熳鳥叮嚀前疇一雨添新  
綠隔屋雙峰送晚青遊子踏歌何日倦田家作社幾  
人醒欲將此景歸圖畫綵筆爭如造化靈

吳波亭

吳潛

吳波亭下繫扁舟輕雨輕烟又麥秋烏兔啣將日月



去江山管定古今愁

吳波亭 入圖畫

歐陽玄

幾迴送客艤吳波  
月上蕪城夜若何  
野迥天低雲拍水  
潮回風細浪生渦  
舳舻不斷咿啞櫓  
闐闐相傳款乃歌  
漁父不知如許景  
家家燈火織烟蓑

雄觀亭

前人

空翠溟濛雲外邗  
路經蕭寺入空砭  
危亭屹立三生石  
勝槩雄吞萬里江  
虎踞岍痕山聳屬  
鼉鳴沙嘴浪

春撞登臨每動歸  
與興慚愧滄洲白  
鷺雙

題蕪湖雄觀亭

陳造

大江來東南旁受衆壑輸  
下驛峽門窄積水陡下百  
尺餘勢如千鼓駭萬馬  
闐闐嚙蹙崩騰排軋爭危塗  
螺磯賴是作齟齬不然頽  
沙裂岸寧復通舳舻霜晴  
似揭天兩鏡瞥眼浪濤相  
吞屠不知河伯窟宅託何  
所只應蛟鱷跋扈無寧居  
陰晴明晦何限景付與沙  
鷗浦鷺綸竿夫令君作亭  
攬其要豁然眼界了江湖



我昔暫登覽詩瓢仍酒壺寒聲隱隱撼窗戶綠霧噴  
噴擅曉晡吳檣楚柁亂秋葉蜚山湧雪略座隅淮山  
千髻更在洪濤外昏煙淡日時有無昆陽勝負等蠻  
觸魏中之梁直鎬銖人生紅塵中局縮轅下駒安得  
李成王宰不死俱在眼水墨揮灑丹青摹江山千里  
入卷軸從此不敷玄圃崑崙圖

雄觀亭

徐律時

危亭矗雲表空翠函太虛下有萬丈潭鼉鳴立江渚

歐陽湖汎舟

曾表

微雨宵初歇空山晚自幽景從秋半過樽爲月華留  
寒碧開銀漢清漣溯客舟眷言湖海意能幾到羊求  
同蕭尺木小曼沈崑銅泛歐湖唐允甲

擊楫狂歌思不窮採芹酌酒奠歐公江山姓字因人  
重睇聽風流自昔同瀲灩湖光分月白參差楓樹間  
花紅晚烟十里城東路帶得鍾聲度碧空

長河

吳珍



偶向吳波放盡船水天一色浸嬋娟望中漁火明還  
滅醉看沙鷗鏡裏眠

長河

陳倫

萬頃澄波浸碧天月光如水鬪嬋娟洞簫有客歸來  
晚驚起魚龍未得眠

長河

黃箎

萬頃玻璃一色秋水光蟾影兩悠悠水壺倒浸銀河  
冷玉兔高懸夜氣浮客舫縱橫依斷岸漁燈明滅隔

中洲阿童歌罷滄浪曲閑着烟簑理釣鈎

魯明江詩

楊萬里

峩橋小渡十里長石碗小渡五里強斜風細雨寒蘆  
裏下有深潭黑無底

集杜詠魯港之趣

文天祥

出師亦多門水陸迷畏途蹭蹬麒麟老危檣逐夜鳥

衣至魯港

許有壬

桴鼓遠銅龍前驅列炬紅星芒寒拂地江影靜浮空



太平三書 卷之四  
聽語漁邨近連帆水驛通不才慚傳食餼菜足爲供

魯港河

薩都刺

吳姬水調新腔改馬上郎君好風采王孫一去春草  
綠謾有狂名滿江海歌詩呼酒江上亭墨花飛雨江  
不晴江風吹破蛾眉月我亦東西南北客

題魯港驛壁

周忱

平明出涇溪命楫趨魯港問知途路遙幸喜春流長  
揮手別羣僚鳴鉦助雙漿揚揚綵鷁飛淙淙灘瀨響

琴臺倏已過江山遽回仰午爨南陵河晚入蕪湖壤  
浮生苦勞役兼程日來往淹畱固所憂遇順增悒快  
但惜逢名山過目乏延賞紀勝謾題詩悠悠起遐想

蕪關大雪二首

王思任

楚天吳水一江纖潮落谿灘十八巖人在漆園迷蝶  
夢市如膠鬲溷魚鹽凍吟雖詫能隨郢曝獻還愁未  
卽簷爲檄旅商同日至黃雲封靜萬檣尖  
抱關一樹亂啼鴉天女縹蠶撒素車布轉蕪陰春未



六平三書 卷之四  
染絮分蘆岸月生花占豐盈寸還三尺冷縮千門與  
萬家却妒老漁方入畫雪簑停雨拍江叉

大江行

徐媛

鼓濤翻翻吹疊練平鋪一帶紋如剪迅激驅湍發濫  
觴衝流軋岸排星點海澤空涵鏡面沙葩揚石蚌雨  
噴霰海月柱脚桂搔頭土肉腹垂小兒腕蘆人春水  
鈎紅藥估客迎風流竹箭捧盤鮫人澤舍媚遵皋交  
甫沉雙璫靈均抱石賦滄浪神龜寄夢陳漁使噉噬

轉日走玻璃璇宮月午蟾蜍墜巨浸乾坤南紀開星  
躔錦帶連淮泗潯陽月夜司馬船洞庭波上湘妃淚  
吳娃倚扇障團沙羣女凌波歌採芰樓船簫管咽還  
通綺陌風香桃李醉江中白霧高插天三山半控青  
雲邃草暎雲昏古樹低花蟠日暄胭脂膩采石磯頭  
月滿樓水濶臺空鳳凰避長干夜半秋風姿剪碎一  
江帆影翠惟有津頭楊柳春年年刷綠追行騎



太平三書卷之四

太平三書卷之五

濟南張萬選舉之甫編輯

蕪湖勝槩二集

湖陰曲和溫庭筠

李綱

繡鞍玉勒黃金鞭躍馬直入無王前繞營三匝人不  
識天風翻動旌旗鮮賊臣晝寢蒼黃起夢裏陽烏光  
照水追風鐵騎去非遲真主那從賊中死寶鞭傳玩  
日淒淒行遠不聞天馬嘶千金安用試虎口將帥何



人思鼓鞞西南火星寒有鉞畫衣繡袞垂平章九重  
宮殿銷春色豈知萬里秦城長

過蕪湖

南 埜

湖山夢不到襄闈六載沉酣一出遲漁子能言飛渡  
處市翁親見潰師時權臣貴戚戈相籍北槳南檣風  
背馳事逐孤鴻今已矣年年水落荻芽肥

過蕪湖

貢師泰

昨日何處別今朝此地畱青山逼岸起白水滿江流

雨隱巡鹽鼓風腥掛網舟何時歌款乃同買綠蓑遊

神山雨

許有壬

山中日日雨松竹早知秋清響自深夜逸人無遠愁  
窓虛聞葉落林暗見螢流對景因懷杜江村事事幽  
欲攜竹杖叩巖扉尊酒同人坐翠微日暮青山看不  
盡白雲遙伴老僧歸

赭山

孫 旭

滴翠軒

馬 亮



高閣登臨暑氣空  
綠槐蟬噪咽清風  
我今到此須懷感  
多少行人道路中

清風樓

程員

雄然百尺清風樓  
砥柱屹立江之頭  
勢欲吞此長江流  
蛟龍蟠下潛生蚪  
峻嶒煙浪擁丹丘  
淮山前列飛浮旂  
五月六月寒飈颼  
送君攜酒先泊舟  
舉頭南北心悠悠  
君今壯行登瀛洲  
玉瓶倒盡胡綢繆  
一方豪氣憑君收  
散分天下作此清  
風儔

荆山

林弁

磅礴屹立湘陵中  
雄奇萬仞摩蒼空  
天寒地凍艸木落  
獨見森爽開芙蓉  
芙蓉倩翠嵐光簇  
雪洗山容奪人目  
微明螺髻幾抹青  
隱映蛾眉半痕綠  
雲蘿烟篠難躋攀  
流泉掛壁飛晴瀾  
劃然點破自然碧  
忽來孤鶴峰前翻  
乾坤造化相推遷  
後凋松柏含春煙  
須臾寒色變和氣  
降靈吐秀鍾英賢

荆山記

曾表



嶺南野叟曾表曰蕪湖濱大江西澣宅平行其作邑  
治依微數峰若江雲然遙遙東南來二山壁立號荆  
山九域志云卞和得玉之所豈蕪故臯茲爲春秋楚  
封固有之歟按圖經姑孰北來二十里有鳳凰山迤  
邐入蕪境西起神山越赤鑄左亘柳家迤入縣爲後  
山其縣南來三十里有白馬山白馬左出而東爲施  
陸山東以北爲磴根山孤山大荆山小荆山而盡於  
丹陽之濱此圖經之概也而形家之論謂蕪祖九華

派出楊木渡起白馬屹荆山渡河而西爲神山其脉  
經百家店河故河中多崩洪石委蛇隱躍狀若虬龍  
丹陽諸湖皆其養蔭荆實爲蕪少祖故其勝律兀奇  
絕與古來風會若有肖云荆山去邑十六里水陸皆  
從馬塘路南一路有石甃乙卯年沈孝廉鳳來荆路  
極水府廟迤西而入爲大荆山高二十五丈周  
迴九里山口居人二十餘家碧桃翠竹夾道陰森時  
聞雞犬聲入山門便作桃源境界觀矣百餘武爲朱



太平三書 卷之五  
四  
家園園有亭館花卉可坐亭孤縣半壁最幽眇其麓  
時有白雲出沒園南二百餘武東折上旋北二十武  
爲坊門爲梵宇晉唐時建後倚石壁橫十餘丈高五  
丈如屏滿面皆生佛大小百數各肖其相丙辰水部  
鄭公薨簷其上爲石佛殿殿左腋石門梯三折攀緣  
而出轉磴道下又左爲文昌祠祠最峻階三十餘級  
坐瞰長江下臨歐陽湖湖古道通百家河可數百畝  
環合岡陵邑令歐陽圭齋先生嘗遊其間俗遂以先

生名湖詩載邑乘今湖改爲田遊踪遂絕閣左過石  
梁爲華嚴樓旁有鄭水部碑亭邑孝廉湯惟一撰文  
樓通山巔古傳鶴跡石仙人所遺及後盜鑿其跡滅  
沒樓左竹徑劣崩下歷翠微石繞足如筍如鈎如圭  
如劍戟可緩步不能肩輿三里許有壁如削橫百餘  
尺壁下方石可坐二十人面對天城湖四時燄光陸  
離如石鏡坐間習習風生丁巳春侍御駱公偕水部  
劉公游鐫題寒壁二字壁頂員秀遠望若金釜卽之



皆巉石可畏上勒嘉靖間許水部買山碑循湖崖二  
里許爲小荆山狀類蛾眉山古志東南麓有龜文石  
石下有穴時出龜與大荆山夾湖對峙形家謂邑文  
學天馬星中立梓潼祠上豎禁採石碑亭聞之父老  
荆山舊縣民籍牟利者日尋斧其間氣脉凋殘文風  
寥落若而年水部許公邑令邵公捐金買山爲官斥  
採鑿又若而年王氣始完由此言之荆山之祖燕而  
不以丹陽盡徵矣丁巳歲浦城之役黠工謬言荆有

石可採捧南廠三檝至旦夕欲嚙且盡闔邑震驚幸  
藉手士民疏上請輟之旣博士弟子白水部錢公公  
戊午夏招遊得寓目焉憮然久之曰世有至壁人不  
護而惜乃忍之哉於是出寒壁步大荆東偏望萬頃  
湖汪洋萑葦菁蔥沼流清濁分環匝其下指而曰此  
平巒帶河者夫非山之門人人舉足可到橫目可索  
乎其爲我亭而碑之以觀來者烏在乎山之陽而徒  
與苔蘚風雨莽莽盡也乃貽太官鳩工速視成事于



是荆山益巍然東南巨鎮焉脩仲子曰余少讀毛氏  
詩至魯保有鳧繹與太山並頌疑並峙矣旣長遊鄒  
魯故墟鄒西北鳧繹在焉以眎荆何翅一卷而名藉  
甚豈培塿足術哉廣洋之內天地奧區必有靈根異  
脉沈鷲翔翼而來故荆胤九子而屹立平蕪一卷猶  
萬仞也又况其嵯峨廓落滌河挾湖莽蒼沈濛雲起  
風呼四空無礙九野同趨日升月盪平楚吞吳當春  
時和百卉昭蘇連帷擊楫人士禺禺江天浩渺若駕

舳艫懸崖拍岸浴鷺排鳧青疇拂浪綠沼搖襦金飈  
送羽嘹唳天衢霜黃雪白翠黛不渝自公多暇時問  
菑畲邇而撫之荆珍魯璵悠而會之輞川鑑湖古今  
鄒魯屹峙同符願言保之片石千璫時戊午六月六  
日記

嶧磯紀事

王宗聖

義烏外史王宗聖曰登嶧磯者取諸江上孤峯風景  
清絕而往事是非姑寘之云昔劉備爲荊州牧治公



安孫權憚之獻妹固好及備西權請歸妹備定益州  
時孫夫人還吳已十載羣下勸之納劉琰妻爲夫人  
後進爲王后皇后尊爲太后皆琰妻吳氏蓋孫在劉  
僅再稔先主後主卽位推尊俱不之及其備夫人仍  
牧夫人是已權始謀之妹將于閨闈之內甘心備焉  
不可而迎歸事成孫夫人舟及磯且近建業自謂不  
忍見兄遂沒于磯則其死在備之先其卽位也曷不  
加尊而表之乎或謂省母過灤江聞昭烈崩哀殞葬

此山則其死在備後禪之卽位又曷不推尊而表之  
乎若權母以己丑卒昭烈以壬寅崩謂壬寅省母歸  
則其所省者非旣卒之母邪歸妹在辛卯省母在壬  
寅豈歸吳矣而又曷日返蜀邪要皆不經之言無足  
辯者使孫果爲劉而死則其轟轟然貞心姱節可垂  
後世而烈穆二后傳未嘗少及之何也獨以穆皇后  
傳附見孫夫人然及其還吳之音而不及其死劉之  
故彼所欲有甚于生是豈輕死者邪人知操爲漢賊



太平三書 卷之五  
不知權爲漢賊孫夫人之死爲劉所以爲漢質諸綱  
常權視妹媿死萬萬矣予是以惜陳壽之略於史也  
卽壽銓叙或略而裴松之旁撫缺遺於此獨遺之何  
也大都孫氏死事莫詳意必有近似者是以國人義  
之俎豆血食歷宋元至于今我 太祖平漢遡江次  
于磯龍袍香帛之祝政以其生貞死靈而奇之也若  
夫雨暘愆期禱磯立應風濤怒驚往往委命必江之  
神也而神廟之麗江上抑流俗從夫人借以神其事

俞磯頭有螺穴其磯絕景一小金山宏藝苑詞人古  
今操觚者弗可輟云山史云靈澤夫人龍女之神也  
宋政和中降祝板亦云螺磯山靈澤廟龍女靈澤夫  
人則神爲龍女無疑必以孫劉之誕委曲證之鑿而  
陋矣

螺磯迎神曲

邊維垣

涉大江兮泫泫見帆檣兮如雲緬神女兮駕馭望瑤  
崑兮杳深聞環珮兮至止享千秋兮蘭芷



送神曲

前人

奏鈞天兮雕闌集海錯兮神歡波不動兮月明山空  
寂兮鶴鳴香篆銷兮神返承休祚兮綿遠

螺磯

王畿

大江東下一螺雄玉女棲靈是舊宮遙望天門渾欲  
斷迴看吳苑正無窮關河不改漢時月童冠猶存沂  
上風明日扁舟向何處九華應在萬山中

謁靈澤夫人祠

劉曰寧

廟貌風波地蛟龍護水紋江通巫峽道山接石頭雲  
劍佩思神武犧牲動聽聞舊斑南岸竹非止爲湘君

靈澤夫人祠

胡啓先

螺磯石小如拳江可涸石年年江流日夕催行客蜀  
漢亾魂挽不得美人遺恨何能平悲風颯颯雲冥冥  
石上千秋應有靈

夢日亭

楊萬里

老賊平欺晉鼎輕一輪日色夢中驚寶鞭脫急非無



策何似休將日繞營

玩鞭亭

張憲

畸鳥壓營營作聲紅光紫電圍金鉦黃鬚小龍馬上  
笑白首饑豺夢裏驚老奴怒擲珊瑚枕追兵起合琉  
璃井巴馬東歸疾似風道傍遺糞如冰冷健兒空玩  
七寶鞭荆臺老姥功誰傳

歐陽湖卽事


曾表

湖姓歐陽自昔年先生風月信無邊西湖可了官何

事南顧無憂吏亦仙滄海豈須論變態高山猶自見  
前賢憑闌不盡觀原意獨立滄茫問簡編



太平三書卷之五終





程